



Protocol dalla radunanza generala 2025

Dall'Uniun Rumantscha Grischun Central (URGC)

igls 13-5-2025, allas 20.00 ouras an l'ustareia Punt Crap (Rofflaschlucht).

Preschaint:as: 10 inclus giasts

Stgis:adas: Gierina Michael, Petra Uffer, Pia Plaz, Silvia Demarmels, Romano Plaz, Otto Denoth, Daniel Wasescha, Marc Decurtins, Leo Thomann

1.Bavagnaint

Igl suprastant Rico Michael, benevainta tot igls preschaints cordialmaintg. El fò ena curta survista digl tema latent - mancanza da persunal en la suprastanza. Gierina è da viadi e Simona stat siva da la fegn digl onn an disposiziun scu promotoura regionala per la Lia e betg ple scu co-presidenta. Percheigl è nia decidia an la suprastanza tgi Rico magna chella radunanza.

Avant la radunanza generala, allas 19.00 ouras, èn tots stoss anvidos ad ena guida tras la tgavorgia dalla Roffla.

En special bagnvegna fò el ad Urezza Famos, la co-presidenta da la Lia. Patric Vinzenz igl represchaint digl Grischun Central ainten la suprastanza dalla Lia ed a Carmen Caspar tgi represchainta la direcziun da la Lia.

2.Elecziun d'en dombravouschs

Gian Sonder vign proponia ed eligia unanimaintg

3.Approvar igl protocol dalla davosa radunanza generala

Igl protocol è publitgia sen la pagina da web. Angraztgond vign el approvo unanimaintg.

Rico menziunescha tg`igl protocol vign chest`eda scretg da Simona Demarmels.

4.Approvar igl rapport annual 2024

L'antieriura presidenta Simona Demarmels preligia igl rapport, tg'è er publitgia sen www.urgc.ch ed an la "Revista digl noss Sulom 2025/3". Igl rapport vign approvo unanimaintg.

5.Approvar igl rendachint 2024 ed igl rapport digls revisours

Flavio Guetg preschainta igl chint digl onn 2024. Igl chint sera cun en sperdita da CHF -7'710.83. La somma da bilantscha monta a CHF 72'565.29. Igl rapport digls revisours preligia Beat Jenal. El propona d'approvar igl rendachint e da discarger la supastanza. Chegl succeda unanim.

6.Elecziuns: dus suprastant:as

- Simona Demarmels ò demissiuno scu co-presidenta. Ella lavoura ossa scu promotoura regiunala Grischun Central, per la Lia Rumantscha.

- Flavio Guetg ò demissiuno scu suprastant.

Rico angraztga ad els dus per lour angaschamaint e surdat en pitschen regal da cumgio. Displaschevlamaintg sò la supastanza betg preschentar dus novs suprastant:as. Rico Michael declerar tge tg'è nia fatg per catter successour:as:

-telefono e dumando a ple tgi 20 persungas, cun mintgamai disdetgas

-RTR e la FMR on rapport dalla tschertga

- publitgia en inserat ainten la Pagina da Surmeir (sponsero da l'URS)

Rico Michael declera agls preschaints tgi las persungas tschartgedas on d'esser tenor igls statuts digl Surmeir. El preschainta pero er igl concept da la supastanza per mantigneir igl manaschi da la uniun.

Per l'egna menziunesch el tgi Patric Vincenz e Simona Demarmels vignan anavant ad esser preschaint an lour funcziuns tar la Lia, allas sedutas da supastanza.

Uscheia tg'igls interess digl Surmeir èn venavant represchentos. Els èn er persungas da contact per l'uniun u la publicitad an Surmeir.

Pi anavant è l'administraziun surdada an en mandat a Bunafè, la firma da Patric Vincenz. Chegl per garanteir igl manaschi (p. ex. chints per la "Revista digl Sulom"/ chints per la contribuziun annuala e.u.a.). Chesta maseira dess er discarger la supastanza redutgeida.

Discussiun:

Gian Sonder: *menziunescha tgi er tar l'URS maintgan persungas ainten la suprastanza.*

Urezza Famos: *preschainta las maseiras da la Lia tigl tema: mancanza da persungas, tgi surpeglia posts uffizials an uniuns. Chegl seia betg angal en tema aint igl Grischun central mabagn an l'antiera Rumantscheia. Lour retschertgas on muss tg'igl interess è avant mang, ma betg da s'engaschar fix an uniuns. Chegl pretenda ena midada da structura. I vign pitost tschartgea gruppas cun igl madem interess e projects temporars.*

Patric Vincenz: *fò attent tgi la structura da la Lia cun lour uniuns affiliadas dereiva d'en oter taimp. Perche gl seia la situaziun dal'uniun betg ena supressa. El dei tgi la Lia s'occupa pigl mument cun la dumonda: tge è oz igl pensum da la Lia. Cò seian er integradas las ponderaziuns: Scu anavant cun las uniun affiliadas?*

Soluziuns èn oramai an elavuraziun e la tschertga da suprastant:as vò anavant. Igl manaschi dal'uniun è cun treis suprastant:as (Gierina Michael, Rico Michael e Mathias Kunfermann) siero ma betg conform agls statuts.

7. Fixar igl program d'activitads 2025

Fegnameiras pigl onn 2025

- Edeir la Revista digl noss Sulom, redacziun separat
- Cuntinuar cun l'acziun: repartair codeschs per unfants dalla scoligna
- Collavuraziun cun la cuminanza dalla Val Schons
- Sustigneir las uniuns digls giovens tar lour teaters rumantschs
- Observar e sustigneir igl svilup digl rumantsch
- tschertga da dus suprastant:as
- collavuraziun cun la biblioteca pertutgond en cantung rumantsch, scu er prelecziuns da codeschs per unfants
- preschientscha da l'URGC durant igls curs da stad se Surmeir.
- Far reclama per l'uniun an las medias rumantschas (p. ex. La Pagina)

Discussiun:

Bartolome Tschanner: *giaveischa tgi l'uniun è pi preschainta. El è digl meini tgi la mancanza d'interess – er oz tar la RG – è percheigl tgi l'uniun è mengia pac preschainta. Bleras persungas son mianc tgi dat l'URGC u son betg tge tg'ella fo. El supplitgescha da far duple reclama*

Gian Sonder: *fò attent tgi l'URS fò quatter gedas ad onn en'ediziun gronda. El vei la pussebladad da far reclama per l'URGC an chellas ediziuns. El fò er attent tgi l'URS ò l'incumbensa da la federaziun da sustignair igl lungatg. Uscheia tgi cheigl fiss er en sustign tg'els son porscher.*

Igls preschaints acceptan igl program ed igl sustignan unanimaintg. La suprastanza peglia ancunter igl giaveisch da far duple reclama.

8.Approvar igl preventiv 2025

Igl cassier, Flavio Guetg, preschainta igl preventiv tgi prevei antradas da 45'400 francs e sorteidas da 50'800 francs. Igl preventiv vign approvo cun gronda pluralitad, er sch'el prevei en deficit.

9.Fixar las contribuziuns annualas 2025

Las contribuziuns da commembers, tgi montan a CHF 30.- per singuls, CHF 50.- per conjugals, per collectivs e persungas giuridicas, restan scu anfignen a daco.

10. Varia

Rico Michael surdat igl pled allas commembras ed agls commembers.

Mathias Kunfermann: *angraztga per igl sustign tigl project Articular. Igl seia sto en grond success e geia anavant.*

Urezza Famos: *dei tgi igl project Articular seia en stupent exaimpel per chella furma da projects temporals cun ena gruppa dad interess communabels. Ella animescha la suprastanza da s'orientar an chella direcziun. I seia er ena pussebladad dad inserar en'occurrenza noua tgi tals projects vignan preschentos e sustignia dal'uniun .*

Gian Sonder: *giaveischa tgi las uniuns seian pi pac elitaras e pi manevel ad igl pivel. El fò er attent a diversas observaziun tg`el ò fatg: p. ex ò igl mastral tigls davos cumegns da Surses mantganto da puspe midar sen rumantsch, siva d`ena discussiun tudestga. Pi anavant vignan igls plets d`amprem avost adegna fatg per tudestg. Er sen intschess rumantsch.*

Patric Vincenz: *fò attent sen igl project da la Lia Rumantscha: Check-in Rumantsch. Noua tg`igl vigna tschartgea igl discurs cugls cumegns.*

Simona Demarmels e Flavio Guetg: *s`angaztgan per la bunga collavuraziun e per tot tge tg`els on dastgea amprender. Els sottastritgeschan tgi els on cunzont amprandia a canoscher la Sotselva e stimo chel contact surregiunal. Er schi chegl ò adegna puspe procuro per sveidas.*

Rico Michael angraztga a tots per neir ed anveida an nom dal`URGC tot igls:las preschaint:as ad en aperitiv.

Fegn dalla radunanza allas 21.30 ouras

Cunter, igls 19-05-25

Demarmels

Simona